



*Selasa, 14 Maret 2023*

**Ogen: Mazmur 42: 7-12**



**Dibata Ingan Pengarapen**



**S**ekalok Moria si latih ukurna, sabap igejapkenna arah apai pe enggo reh si "nerang" ia. Perbeben si mberat nderpa kegeluhenna. Perbulangen si rusur mabuk-mabuken, anak-anak si ngidah perubaten orang tua pe nggeluh alu rate-ate, anak-anak si terjerat ku bas pergaulen bebas ras terjebak narkoba, anakna si diberu pe labo kalak si mediate man keluarga bage pe orang tua, dirina si enggo latih rukur enggo ikenai pinakit. Erpengakap me ia maka lanai lit si jorena, enggo rusur bagi tempa ibegina sora "uga nge kam ena...lanai lit sinampati kam. Kam si liahna bas kegeluhen enda". E maka rusur ia ngelabuh dengen rusur mesui takalna. I tengah-tengah situasi si bagenda rusur ia tangis, suari berngi tangis ia mawen la tertunduhkenna.

Situasi erndeale ate, susah dengen perukuren mberat pernah inanami Bangsa Israel erbanca ia ngandung rusur, iluh man panganna. Payo pengelakona nge si erbanca ia bage, pengelakona la setia man Tuhan e maka ia seh i taneh perkawanan Babil. Amin bage gia, ersura ia mpekeke kiniteken dengen keyakinanenna man Tuhan, pasti isampati Tuhan atena e maka tetap lit pengarapenna man Tuhan.

Ayat 9: rende tupung berngi, ertoto man Dibata ulu kegeluhen.

Ayat 12: Dibata inganku erpengarapen, kupuji ia.

Kita pe Moria, selaku nande bas tengah jabu, entah kai saja si jadi perbebenta, ola nggit megendek ukur. Tapi tetap inget dengen erpengarapenlah man Tuhan. Labo sekalienda denga kita erbebe bas kiniseran. Ula kita nggit rukur si sada, ituriken arah pertotonta man Tuhan. lit wadah PA Moria jadi inganta sharing, lit si enggo puluh i bas perbeben, pengalamenna e mpeturah semangatta nggeluh. Si bage nge perlu bas kegeluhenta enda. Rende kita muji Tuhan arah e turah pengarapenta, kita ngorati Kata Dibata reh gegehna kinitekenta.